

## Inatsisissatut siunnersuummut nassuiaatit

**Nalinginnaasumik nassuiaatit**1. Aallaqqaasiut

Allannguutissatut siunnersuuteqarnerup siunertaraa Inatsisartut Siulittaasoqarfiannit allanngortitsinissamik kissaatit aalajangersimasut pingasut timitalerneqarnissaat:

- 1) Tunngaviusumik tapiissutit partiinut nutaarluinnarnut tunniunneqartannginnissaannik ullumikkut suleriaasiusumut inatsisitigut tunngaviusup erseqqissarneqarnissaa.
- 2) Inatsisartunut ilaasortanut ataasiakkaanut tapiissutit siunissami tunniunneqartassanngitsut qaammatinut ilaasortap pineqartup paasissutissanik pinngitsoorani tunniunneqartussanik tunniussiviginngisaanut.
- 3) Aningaasartuutit, partii sinnerlugu aningaasartuutigineqarsimasut, Inatsisartunit partiinut tapiissutinit ilanngaatigineqarsinnaanerannut periarfissiisoqarpoq.

2. Siunnersuummi immikkoortut pingaarnerit

Inatsisartut Siulittaasoqarfiata ulluni 25. aamma 26. februar 2014, taamatullu aamma 10. Aamma 11. januar 2015 isumasioqatigiinnermini malittarisassat assigiinngitsut Inatsisartut sulineranni najoqqutarineqartut nutarterneqarnissaannik pisariaqartitsineq oqallisigaa. Naalackersuinikkut sulineranut aningaasatigut tapiissuteqartarnej pillugu inatsisitigut malittarisassani pingasutigut allanngortitsisariaqarnej paasinarsisimavoq:

*2.1 Partiinut nutaanut tunngaviusumik tapiissuteqartannginnissap erseqqissarneqarnera.*

Malittarisassat atuuttut malillugit naalackersuinikkut suliniaqatigiiffik Inatsisartuni sinniisuutitaqartoq partiip naalackersuinikkut sulineranut tapiissutisisinnaatitaavoq, tassa ukiumut tunngaviusumik tapiissutinik 650.000 kr.-inik kiisalu tamatuma saniatigut partiip ilaasortaataatitaanut ataasiakkaanut tamanut ukiumut immikkut 210.000 kr.-inik.

Malittarisassat inatsit malillugu imatut aqunneqarsimapput partii Inatsisartunut qinersinermi Inatsisartunut ilaasortaataitaqalersimassalluni ukiumut tunngaviusumik tapiissutinik 650.000 kr.-inik pissarsisinnaatitaassaguni. Tamanna minnerunngitsumik § 2-mut inatsimmut nassuiaataaqqartuni erseqqissarneqarpoq: ” § 2-mi nalunaarneqarpoq aalajangersagaq tunngaviusoq tassaammat kikkulluunniit Inatsisartunut qinigaasimasut partiimeersuugunik, kattusseqatigiinnersuugunik kisimiillutilluunniit qinigaasimagunik aalajangersimasumik annertussusilikkamik inatsisitigut tunngavilimmik tapiiffigineqarsinnaatitaasut qinnuteqarnermik (...). Taamaattorli kissaatiginarpoq tamakku erseqqissumik malittarisassaartinnissaat aamma inatsisip aalajangersagartaviini.

Partii nutaaq taamaallaat Inatsisartuni ilaasortaataqalersoq, ass. Inatsisartunut qinigaareersut ilaat arlallilluunniit partiitoqqaminnit anereriarlutik partiimik nutaamik pilersitsinerisigut, taamaalilluni suleriaaseq maannamut atuussimasoq tunngavigalugu tunngaviusumik tapiissutisinnaatitaanngilaq, Inatsisartunut qinersinermi partiip Inatsisartuni issiatitaqartariaqarnera qinersisartunit uppersineqarnissaa tungaanut.

Partiili ilaasortamut ataasimut nalinginnaasumik ukiumut 210.000 kr.-inik nalinginnaasumik ilaasortamut tapiissutisinnaatitaavoq. Tapiissutit qaammatip ilaasortap partiitoqqaminit ilaasortaajunnaarfigisaata naggataanit tunniunneqartarput.

Inatsisartut Siulittaasoqarfiata nalilerpaa suleriaaseq atuuttoq attatiinnarneqartariaqartoq, taamaalilluni partiit ilaasortaataat aningaasatigut tunngavissaqaleqqunagit ass. partiit atuuttut qimannissaannut partiinillu nutaanik pilersitsillutik. Inatsisartut Siulittaasoqarfiata taamaattoq kissaatiginartutut isigaa, inatsimmik paasinnineq suleriaaserlu atuuttut inatsisip oqaasertaani namminerni erseqqissumik allassimalissasut, § 2, imm. 1, oqaaseqatigiit aappaannut nutaamut siunnersuummi takuneqarsinnaasutut.

## *2.2 Inatsisartunut ilaasortap ilaasortaannermi saniatigut atuuffini allat*

*paasissutiissiissutiginnikkaangagit ilaasortamut tapiissutit tunniunneqartannginnissaat.*

Ullumikkut Inatsisartut Siulittaasoqarfiannit aqunneqartumik nammineq piumassutsimik nalunaaruteqartarnermik aaqqissuussineqarpoq. Aaqqissuussineq naapertorlugu ilaasortat namminneq aningaasatigut soqutigisat inatsisartutiguunngitsumillu atukkatik (atuuffiit inuussutissarsiutillu) qinersisartunut ammasumik ingerlatsinissaq eqqarsaatigalugu nammineq piumassutsimik tamanut saqqummiussinnaavaat. 2013-imi 2014-imilu qinersinerir kingorna Inatsisartunut ilaasortaalersut amerlanerit taamatut atuuffinnik nalunaarsuiffimmut atuuffimminnik paasissutissiisimapput.

Atuuffinnik nalunaarsuiffimmit paasissutissat ullumikkut [www.inatsisartut.gl](http://www.inatsisartut.gl)-imi toqqagassap ”Inatsisartunut ilaasortat” iluani tamanit takuneqarsinnaapput, ilaasortat CV-visa sanianni toqqagassaq ”Atuuffiit aningaasatigullu soqutigisat” toorlugu.

Atuuffinnik nalunaarsuiffiup siunertaraa Inatsisartunut ilaasortat ataasiakkaat pisortani namminersortuniluunniit atorfiisa akuliusimanerisalu malitsigisaannik soqutigisatigut aporaaffeqarsinnaaneranik innuttaasut ilisimasaqarnerulernissaat. Siunertamut tamatumunnga Inatsisartunut ilaasortat kaammattorneqarput ingerlatseqatigiiffinni namminersortuni pisortanilluunniit pigineqartuni atorfiit, atuuffiit, siulersuisunut ilaasortaaffiit il.il. kiisalu namminersortutut ingerlataqarnerit isertitsiviusartut pillugit paasissutissiisaqullugit. Peqatigitillugu Inatsisartunut ilaasortat kaammattorneqarput pigisatigut atukkatik isumaqatigiissutillu pillugit paasissutissiisaqullugit, ingerlatseqatigiiffimmi soqutigisat 50.000 kr.-it sinnerlugit naleqarpata. Kiisalu paasissutissani pineqarput siusinnerusukkut sulisitsisorisimasanik isumaqatigiissutit aningaasartallit pillugit paasissutissat.

Inatsisartut Siulittaasoqarfianni isumaliutigineqarsimasoq aaqqissuussineq ilaasortanut pinngitsaaliissutaasariaqanngikkaluarnersoq, inatsisilerinikkullu misissuinikkut ersersinneqarsimalluni namminersoneq pillugu inatsit tunngavigalugu tamatumani malittarisassiorsinnaanermut Inatsisartut piginnaatitaasut. Pinngitsoorani atuuffinnik nalunaarsuivimmik pilersitsisoqassanersoq, taamaalilluni Inatsisartut namminneq aalajangersinnaavaat.

Taamatulli pinngitsoorani paasissutissiisussaataaneq atuutsinneqarsinnaassappat tamanna pillugu inatsisini aalajangersagaqarnissaq pissusissamisoorpoq.

Inatsisartut Siulittaasoqarfiata tamatumunnga atatillugu nalilerpaa, paasissutissiinnginnermut kingunerititaasinnaasoq pissusissamisoortoq tassaassasoq naalackersuinikkut sulinermut tapiissutit ilaannik annaasaqartarneq. Taamatut suleriaaseqarnermi isiginiarneqarpoq paasissutissanik tunniussinnginneq naalackersuinikkut suliaqarnerup naatsorsuutigineqartutut annertutigisumik ingerlanneqannginneranut ersiutaasinnaammat.

Peqatigitillugu Inatsisartut Siulittaasoqarfiat isumaqarpoq, tamatuma saniatigut annertunerusumik kinguneqartitsisoqartariaqanngitsoq, minnerunngitsumik pingerluttulerinermik inatsisunik tunngavilinnik. Tamanna nalinginnaasumik isiginnittaatsimut naapertuuppoq, tassami naalackersuinikkut atuuffinni ilungersunannnginnerusumik sumiginnaanerni qinersisartut namminneq nalilersorsinnaasariaqarmassuk taamatut sumiginnaaneq pineqartup qinigaaqqissinnaaneranut sunniuteqartariaqarnersoq.

Tamatumunnga atatillugu Kalaallit Nunaannut Pinerluttulerinermik inatsimmi § 55 innersuussutigineqassaaq. Aalajangersakkakut tassuuna periarfiissisoqarpoq kialuunniip, pisortani kiffartorluni sulitilluniluunniit pisussaaffimmik, kiffartuutimi suliassamiluunniit nassatarisaanik, naammassinnikkumanngitsoq ilaginnaasorluunnit imaluunniit atorfimmini eqqortumik naalakkerneqarnerminut naalakkumanngitsup, atorfimmini suliassanik isumaginninngitsutut eqqartuunneqarnissaanut. Tamanna aamma atuuppoq kimulluunniit pisortani atorfeqartitaalluni suliassaqtartitaalluniluunniit atorfimminik suliassarisaminillu imaluunniit pisussaaffimminik, atorfimmi suliassaqtartitaanermiluunniit nassatarisaanik, naammassinninnissaminik peqqarniitsumik akuttunngitsumillu isumaginninngitsoortaqaattartumut peqqissaarussinngitsumulluunniit. Aalajangersakkamulli erseqqissumik ilaatinneqanngillat atuuffiit pineqartup tamanut ammasumik qinersinikkut suliassarilersimasai, soorlu Inatsisartunut qinigaanikkut.

Tamanna naapertorlugu Inatsisartut Siulittaasoqarfiat isumaqarpoq, atuuffinnik nalunaarsuivimmut atugassatut paasissutissiisussaataanermik naammassinninnginneq pinerluttulerinermik inatsit malillugu malersoneqartariaqanngitsoq, taamaallaalli naalackersuinikkut sulinermut tapiiffigineqarsinnaanermut kinguneqartariaqartoq.

Taamatut kinguneqartitsisinnaanerit inatsimmi § 4 a-mi aalajangersagassatut nutaatut siunnersuutigineqartumi inatsisitigut tunngavissinneqarnissaat siunnersuutigineqarpoq, piffissaliunneqartup iluani paasissutissiisoqanngivippat imalunniit paasinarsissagaluarpat paasissutissiissutigineqartut annertuunik ilungersunartumik amigaateqartut. Taamatut pisoqartillugu tapiissutaareersimasut qaammatit arfinillit kingumut tikillugit uterteqquneqarsinnaassapput.

Inatsisartunut ilaasortat aningaasarsiaqartinneqarnerat aningaasartuutaasalu matussuserneqartarnerat attorneqassanngillat.

### *2.3 Partiit sinnerlugit aningaasartuutaasimasut partiinut tapiissutinit Inatsisartunit ilanngarneqarsinnaalernerit.*

Inatsisartut Siulittaasoqarfiata paasisimavaa Inatsisartut ilaatigut naalackersuinikkut suliniaqatigiiffiit, kattusseqatigiit ilaasortalluunniit ataasiakkaat sinnerlugit sinnerlugu nukissani atuillutilluunniit aningaasartuuteqartariaqartartut. Assersuutigalugu tamatumani pineqarsinnaavoq atortussanik nutserisitsisariaqarneq, imaluunniit nutseriikkani iluarsisariaqarneq, naak inatsimmi matumani naatsorsuutigineqarsimagaluartoq tamatumunnga aningaasartuutit naalackersuinikkut suliniaqatigiiffiit pisussaaffigaaat.

Tamatumunnga pissutaavoq Inatsisartut Allattoqarfiat taamatut pisortillugu taamaattoq partiit sinnerlugu akuliuttariaqartarmat partiilu sinnerlugu aningaasartuuteqarluni, inatsisartutigoortumik sulinerup iluamik ingerlanneqarnissaata qularnaarnissaa Inatsisartut soqutigisarimmassuk. Taamaalilluni Siulittaasoqarfiup isumaa malillugu pissusissamisoornavianngilaq ilaasortat Inatsisartut ingerlaavartumik sulinerinut oqalittarnerinullu il.il. peqataasinnaanerminnit mattunneqarpata, ilusissatut piunasaqaatinik assigisaannilluunniit naammassinninniarnermik ilaasortap taassumaluunniit partiata allattoqarfiata naammassinnissinnaannginnera pissutiginnarlugu, naak Siulittaasoqarfik imminut inatsisitigut pisussaasutut isiginngikkaluartoq partiit sinnerlugit akisussaaffimmik taassuminnga tigusinissamut.

Taamatut pisoqartillugu pissutsit imaakkajuttarput Inatsisartut Allattoqarfiata taassumaluunniit avataanit suleqataata ilusissanut piunasaqaatinut sanilliullugu amigaatinik, soorlu partiit oqaaseqaataasa nutserneqarsimannginnerini amigaateqarneriniluunniit, iluarsiiartariaqartarneri, Inatsisartunut ilaasortap kissaatigineqartutut naatsorsuutigineqartutullu Inatsisartut sulinerannut peqataasinnaanissaa qularnaarniarlugu.

Inatsisartut Siulittaasoqarfiata siunissami qularnaarusuppaa tamatumunnga atatillugu aningaasartuutaajunnartut nukissanillu atuinertit allat ajornannginnerusmik Inatsisartunut utertinneqarsinnaalernissaa, taamaalilluni Inatsisartunut ilaasortat partiillu il.il. pissutissaqaqqunagit nukissanik atuinernik pisariaqartunik Inatsisartunut, taamalu Nunatta

Karsianut, nuussiniarnissaannut.

Malittarisassat maannamut atuussimasut tamatumunnga erseqqissumik periarfissiinngillat, taamaalillutillu Inatsisartut periarfissaqaratik partiit il.il. sinnerlugit aningaasartuutaasimasut partiinut akiligassanngortinnissaannut. Taamatut suleriaaseqarneq akiligassaq pillugu akiliisussaataasumik isumaqatigiinnginnernik pilersoqartillugu ulluinnarni atorneqarsinnaasutut isigineqanngilaq, minnerunngitsumik aningaasartuut Inatsisartut Allattoqarfianni namminermi nukissanik atuinnikkut toqqaannanngitsumik pilersimatillugu, naak nukissat taakku suliaassanut allanut atorneqartussaagaluartut. Inatsisartut Siulittaasoqarfiata taamaalilluni annertunertigut taamatut aningaasartuuteqarnerit nukissanillu atuinerit partiinut il.il. akiligassanngorteqqittarsimangilai.

Partiinut naalackersuineramik suliaqartunut tapiissutinik ukiuni kingullerni qaffaanerit pissutigalugit tamanna naapertuunnersoq apeqquserneqartariaqarpoq, tamatumuunakkummi Inatsisartuni sulinerup siuarsarlugulu patajaallisarneqarnissaanut partiit annertunerusumik akisussaaffeqartinneqalermata.

Minnerunngitsumik 2009 inatsimmik allannguinnikkut (Inatsisartut inatsisaat nr. 16, 3. december 2009-meersoq) Inatsisartut suliernannut atatillugu aningaasartuutitut assigiinngitsunut matusissutissanut Inatsisartut Allattoqarfianniit partiinut nuussisoqarpoq.

Partiinut tunngaviusumik tapiissutit tamanna tunngavigalugu 300.000 kr.-iniit 650.000 kr.-inut qaffanneqarput, ilaasortamullu ataatsimut tapiissut 125.000-iniit 170.000 kr.-inut qaffanneqarluni, kingusinnerusukkullu sulii 210.000 kr.-inut qaffanneqaqqilluni.

Tapiissutit amerlineqarnerannut taarsiullugu ilaatigut nammineq sulisorisanik atorfinitsitsinermut soraarsitsinermullu, partiit atortulersuutaasa assigiinngitsut uninngasuutigineqarnerannut aningaasartuutitut, naqitigassanut pequtinullu kiisalu suliaassanut allanut akisussaaffik partiinit tiguneqarpoq.

Tapiissutitit ilaattut annertuutut partiinut aningaasanik nuussisoqarpoq Inatsisartuni atugassanik nutserisitsinermut atugassanngorlugit. Tamanna pillugu allannguutitut inatsimmi § 1-imut nassuiaatini oqaatigineqarpoq: ””Inatsisissatut siunnersuutip nassatarisaanik assersuutigalugu oqaaseqartartut oqaaseqaataannik ilaasortallu siunnersuutaannik nutserisitsineq siunissami partiit namminneq akilertalissavaat. Tamatumani taakku Inatsisartut atugassaattut piffissaq eqqorlugi nutserneqarnissaannut partiit pisussaaffeqarnerat allanngunngilaq.”.

Inatsisartut Siulittaasoqarfiata tamatuma kingorna arlaleriarluni uparuartariaqartarsimavaa partiit pisussaaffitsinik taaneqartoq isiginngitsuusaaraangassuk.

Ajornartorsiut tamanna siumut isigisumik aaqqiissuteqarfiginiarlugu Siulittaasoqarfiup siunnersuutigaa § 9-mi aalajangersakkamik ilanngussisoqassasoq, Inatsisartut partiit il.il. sinnerlugit aningaasartuutaasa partiinut tapiissutinit ilanngaatigineqarsinnaanerannut inatsisitigut tunngavissiiisumik. Oqaatigineqassaaq § 9, imm. 2, oqaaseqatigiit aappaanni. Oqaatigineqassaaq § 9, imm. 2, oqaaseqatiinni kingullerni aalajangersarneqareermat Siulittaasoqarfiup aalajangersinnaagaa partiimut tapiissutissat kinguartinneqarlutilluunniit atorunnaarsinneqarsinnaasut, partiip ukiuni siuliini tapiissutit qanoq atorneqarnerinut naatsorsuutit kukkunersiuukkanik nassiussinissamik pisussaaffini naammassisimangippagu.

#### 2.4 Inatsimmik allangortitsineq atuuttunut sanilliullugu.

Ataani malittarisassat atuuttut allannguutissatullu siunnersuutit sanilliullugit takusassiarineqarput:

<b>Inatsisissatut siunnersuut inatsimmut atuuttumut sanilliullugu</b>	
Oqaasertai atuuttut	Inatsisissatut siunnersuut
	<b>§ 1</b> Naalackersuinikkut sulinermit aningaasatigut tapiissuteqartarnek pillugu Inatsisartut inatsisaanni nr. 1-imi, 31. maj 2001-imeersumi, Inatsisartut inatsisaatigut nr. 25, 18. november 2010-meersukut kingullermik allangortinneqartut, makku allannguutigitinneqassapput:
§ 2. Naalackersuinikkut suliniaqatigiiffik, partii, Inatsisartuni qinikkanik sinniisoqartoq partiip naalackersuinikkut sulineranut, ukiumut 650.000 kr.-inik tunngaviusumik tapiissummik kiisalu partiip qinigaatitaa ataaseq 210.000 kr.-inik annertussulinnik qinikkatut tapiiffigineqarsinnaatitaapput.	1. § 2, imm. 1-imi oqaaseqatigiit aappaattut nutaatut ilanngunneqassaaq: ”Taamaallaat naalackersuinikkut suliniaqatigiiffinnut Inatsisartunut qinigaatitaqarsimasunut tunngaviusumik tapiissuteqartoqartarpoq.”
	2. § 4-p kingornanut ilanngunneqassaaq: ”§ 4 a. § 2 malillugu qinigaatitamut ataatsimut tapiissutit aamma § 4 malillugu tapiissutit qaammatinut ilivitsunut tamanut Inatsisartunut ilaasortap pineqartup atuuffimminik aningaasatigullu soqutigisaminik allanik paasissutissiisussaataa nerminik naammassinniffiginngisaanut

	<p>tunniunneqartassanngillat.</p> <p><i>Imm. 2.</i> Imm. 1 malillugu paasissutissiisussaatitaaneq atuutissaaq Inatsisartut Suleriaasianni aalajangersarneqarsimaguni. Tassanissaaq aalajangersarneqarsinnaavoq paasissutissat aalajangersimasumik iluseqassasut, taamatullu aamma tamanut saqqummiunneqarsinnaassasut.</p> <p><i>Imm. 3.</i> Imm. 1 naapertorlugu qinigaatitamut ataatsimut tapiissutit tunniunneqareersut qaammatit arfinillit tikillugit utertinneqarnissaat piumasarineqarsinnaavoq, paasinarsissagaluarpat paasissutissiisutaasussat amigaatigineqartut annertuunilluunniit amigaateqartut.”</p>
	<p><b>3. § 9-mi imm. 3-p</b> kingornanut immikkoortutut nutaatut ilanngunneqassaaq:  <i>”Imm. 4.</i> Partiit, katusseqatigiit ilaasortalluunniit ataasiakkaat sinnerlugit aningaasartuutitut inatsit manna malillugu partiinut tapiissutitut Inatsisartut ilanngaasinnaapput ilanngaasitsisinnaallutilluunniit.”</p>
	<p style="text-align: center;"><b>§ 2</b></p> <p>Inatsisartut inatsisaat una ulloq 1. juli 2015 atuutilerpoq.</p>

### 3. Pisortanut aningaasatigut allaffissornikkullu kingunerisassat

Siunnersuutip pisortanut aningaasatigut allaffissornikkullu killilimmik oqilisaassutaanissaa naatsorsuutigineqarpoq. Taamaalluni § 9, imm. 4 siunnersuutigineqartoq naatsorsuutigineqarpoq maannamut Inatsisartut Allattoqarfianni tamatumunnga nukissanik atorineqartartunik killiliisinnaajumaartoq. Tamatumunnga tunngaviuvoq partiit allaffeqarfiisa il.il. ilaatigut suliassanik, naalackersuinikkut sulinermut aningaasatigut tapiissuteqartarneq pillugu malittarisassani namminerminnit ingerlanneqartussat naatsorsuutigineqartunik, tamakkiisumik isumaginnissinnaasimanninnerannik pissuteqarpoq. Inatsisartut Allattoqarfiata arlaleriaqaluni suliassat taamaattut isumagineqarnissaannut aningaasartuutit Inatsisartunut nammagassanngortittariaqarsimavaat, ass. atortussat nutserneqarnissaasa imaluunniit partiit oqaaseqaataasa nutserneqarnerisa pitsaassusiisa qularnaarneqarnerannut.

Tamanna pisarsimavoq inatsisartutigoortumik sulinerup aqqissuussaannerusumik ingerlanneqarnissaa eqqarsaatigalugu.

Taamaalilluni naatsorsuutigineqarpoq § 9, imm. 4-mi malittarisassap nutaap kinguneriumaaraa partiit allaffeqarfiisa il.il. Inatsisartut Allattoqarfiannit taamatut nukissanik atuineq pinngitsoornialerumaaraat, tamanna pissutigalugu aningaasatigut artukkerneqarnissaq pinngitsoorniarlugu. Taamaattoqaraluartorluunniit nukissanik atuisoqartariaqassappat naatsorsuutigineqarpoq malittarisassakkut qularnaarneqarumaartoq nukissat atorneqartut nalingisa annertunerpaatigut pisortanut uterteqqinneqarsinnaanissaat.

Nukissanik atuinnermut eqqartorneqartumut atatillugu maannamut aningaasartuutaasimasut naatsorsuusiorneqarsimanngillat, taakkulu aamma ukiumiit ukiumut annertuumik nikerarsinnaanerat nalilerneqarluni. Aningaasalli annikitsuinnaanissaat missingerneqarpoq.

§ 4 a naapertorlugu paasissutissiinneginnerup amigartunilluunniit paasissutissiinerup malitsigisaanik siunissami ilaasortanut tapiissutinit il.il. ilanngaasarnissaq annerusumik naatsorsuutigineqanngilaq. Tamatumunnga pissutaavoq naatsorsuutigineqarmat Inatsisartunut ilaasortat pisussaaffinnik taamaattumik naammassinnittarnissaat, taakku siunissami pinngitsoorani naammassineqarsimasussatut aalajangersarneqarpata. Tamatumunnga atatillugu oqaatigineqassaaq taamaallaat qaammatinut ilivitsunut paasissitissiivunngitsunut tapiissutinit ilanngaasinnaanissaq siunnersuutigineqarmat, taamaalilluni kingusinaarluni tunniussineq tunniussinissamut killissarititap qaangiunnerani qaammatit marluk tikillugit tapiissutit ilanngarneqarnerinik kinguneqassanani.

Aalajangersagaq taanna malillugu taamaattoq tapiissutinik annikillisitsisoqassagaluarpat, taakku ilaasortamut ataatsimut paasissutissanik tunniussinngitsumut qaammammut 17.500 kr.-inik aningaasartaqassapput.

#### 4. Inuussutissarsiornermut aningaasatigut allaffissornikkullu kingunerisassat

Siunnersuut inuussutissarsiornermut aningaasatigut allaffissornikkullu kinguneqassanngilaq.

#### 5. Avatangiisinut, pinngortitamut nalinginnaasumillu peqqissutsimut kingunerisassat

Siunnersuut avatangiisinut, pinngortitamut nalinginnaasumillu peqqissutsimut kinguneqassanngilaq.

#### 6. Innuttaasunut kingunerisassat

Siunnersuut imaaliallaanaq innuttaasunut kinguneqarnaviannngilaq. Nassuiaatini nalinginnaasuni imm. 3 naapertorlugu pisortanut aningaasatigut allaffissornikkullu sipaarutaajunnartut partiit allaffeqarfiinik il.il. attorneqartunik eqquisussaassapput. Tamatumunngali ilanngullugu illuatungilunneqarsinnaavoq taamaattoqarpat Inatsisartunut ilaasortat ataasiakkaat taakkualuunniit allaffeqarfii, suliassanik, naalakkersuinikkut sulinnermut



anigaasaatigut tapiissuteqartarnek pillugu malittarisassani naatsorsuutigineqartunik, tamakkiisumik naammassinnissimangitsutut oqaatigineqartariaqarmata.

#### 7. Kingunerisassat pingaarutillit allat

Siunnersuut allatigut pingaarutilinnik kinguneqassanngilaq.

#### 8. Tusarniaaneq

Inatsisissatut siunnersuut tusarniaatigineqarsimanngilaq, nalilerneqarmat siunnersuut innuttaasunut inuussutissarsiornermulluunniit kinguneqassanngitsoq.

### **Inatsisissatut siunnersuummi aalajangersakkanut ataasiakkaanut nassuiaatit**

#### *§ 1-imut*

Nr. 1-imut

§ 2, imm. 1-imut ilanngunneqartussatut siunnersuutikkut erseqqissarneqarpoq partii Inatsisartunut qinersinikkut Inatsisartuni sinniisuutitaqalersimassasoq ukiumut tunngaviusunik tapiissutinik 650.000 kr.-iusunik pissarsisinnaassaguni. Tamanna inatsisitigut pissutsinik atuuttunik maannamut paasinninnermut naapertuuppoq, tassami § 2-mut aallaqaammut inatsimmut nassuiaataasuni (UPA2001/7) aallaavigineqarmat tapiiffigineqarsinnaatitaaneq ”kikkunnulluunniit Inatsisartunut qinigaasimasunut partiimeersuuppata, kattusseqatigiinnersuuppata kisimiillutilluunniit qinigaappata” atuuttoq.

Erseqqissaanikkut erseqqissarneqarpoq assersuutigalugu Inatsisartunut ilaasortaq arlallilluunniit partiitoqamminnit tunuarlutik nutaamik partiiliorpata tamanna aningaasatigut iluaqutissarsiviusinnaassanngitsoq.

Naalackersuinikkut suliniaqatigiiffik, partii, taamaattoq immikkoorluinnaq pisoqartillugu partiip aalajangeratigut partiinut marlunnut avinniarluni aalajangerpat, partiit ingerlaqqittut marluullutik tamarmik tunngaviusumik tapiissutit affaannik pissarsisinnaajuassapput, nalorninaatsumik oqaatigineqarsinnaanngippat partiip aappaa kisimi partiitut ingerlaqqittut isigineqarsinnaassasoq.

Inatsisartunut ilaasortat kattusseqatigiillutik qinigaasimasut eqqarsaatigalugit inatsimmi atuuttumi § 2, imm. 3-mi atuarneqarsinnaavoq kattusseqatigiit taamatut, naalackersuinikkut suliniaqatigiiffik, partii, sinnerlugu qinigaasimasutut, ilaasortat naalackersuinikkut sulinerannut tamakkiisumik tapiissutisinnatitaasut. Taamaalilluni aamma kattusseqatigiit eqqarsaatigalugit erseqqissarneqarsimassaaq tunngaviusumik tapiissutit aatsaat tunniunneqarsinnammata kattusseqatigiit Inatsisartunut ilaasortaatitaqalersimappata Inatsisartunut qinersinikkut.

Inatsisartunut ilaasortanut partiit kattusseqatigiillu avataanniittunut § 2, imm. 2-mi atuuttumi aalajangersarneqarpoq taakku aatsaat tunngaviusumik tapiissutisisinnaatitaasut partiit kattusseqatigiilluunniit avaqqullugit Inatsisartuni ilaasortaataqalersimagunik. Inatsisartunut ilaasortat partiit kattusseqatigiilluunniit avataanniittut ilaasortat allat assigalugit qinigaaffiup ingerlanerani nutaamik partiiliorunik partiimulluunniit nutaamut nuukkunik partiimut nutaamut tunngaviusumik tapiissutisisinnaassanngillat.

Allannguutissatut siunnersuutigineqartoq ilaasortaataamut tapiissutisisinnaanermut, ilaasortanut tamanut tunniunneqartartunut, sunniuteqassanngilaq.

Nr. 2-mut

Aalajangersakkakut § 2 malillugu ilaasortanut tapiissutit aamma § 4 malillugu tapiissutit tunniunneqartarnerat killilerneqarsinnaavoq Inatsisartunut ilaasortat nammineq atuuffitik aningaasatigullu soqutigisatik pillugit Inatsisartunut pinngitsoorani paasissutissiissutissanik tunniussaqaqsimanngippata.

§ 2 malillugu ilaasortanut ataasiakkaanut tapiissutit partiinut kattusseqatigiinnulluunniit ilaasortanut kiisalu kisimiillutik qinigassanngortittunut Inatsisartunut qinigaasimasunut tunniunneqartarput. § 4 malillugu tapiissutit attaviitsunut tunniunneqartarput, tassa Inatsisartunut ilaasortat partiimit kattussuseqatigiinnulluunniit qinigaaffimminnit tunuarsimasunut. § 4 malillugu tapiissutit taakku § 2 malillugu ilaasortanut ataasiakkaanut tapiissutitut malittarisassanut naapertuupput, taamatullu aamma tunniunneqartarlutik.

Imm. 1-imi aalajangersarneqarpoq ilaasortanut ataasiakkaanut tapiissutit aamma § 4 malillugu tapiissutit qaammatinut ilivitsunut tamanut Inatsisartunut ilaasortap pineqartup atuffimminik aningaasatigullu soqutigisaminik allanik paasissutissiisussaataitanerminik naammassinniffiginngisaanut tunniunneqartassanngitsut. Imm. 2-mi erseqqissarneqarpoq paasissutissat suut taamatut pisussaaffimmut ilaatinneqassanersut.

Paasissutissaq amigaatigineqassaaq piffissaliunneqarsimasooq qaangerneqarsimappat paasissutissaq ilusissamisut iluseqarluni Inatsisartunut tunniunnagu. Annertuunik amigaatilinnik paasissutissiineq paasissutissiinnnginnertut isigineqarsinnaavoq, imm. 3-mi najoqqutaq tunngavigalugu, paasissutissallu eqqunngitsutut ingerlaannaq takuneqarsinnaasut iluarsineqarnissaat piumasarineqarsinanavoq, paasissutissat tiguneqartutut isigineqarsinnaalissappata.

Aalajangersakkami taamaalilluni ”tunniunneqartassanngillat”-mik oqaasertaliinerup malitsigissavaa qaammammut pineqartumut tapiissutit tunniunneqannginnissaat. Taamaalillunilu tapiissutit uninngatik kallarneqarnissaat pineqanngilaq.

Tunniussinnginnerit qaammammiit qaammammut pisassapput. Tunniussinnginneq taamaallaat atuutissaaq piffissanut qaammatini ullut tamaasa paasissutissanik amigateqarfiusimasunut. Paasissutissat qaammatip ilaannaani amigaatigineqarsimappata, qaammammut tassunga tapiissutit soorunami atorunnaassanngillat.

Assersuut: Ilaasortaq pisussaaffilerneqarsimavoq kingusinnerpaamik ulloq 10. februar paasissutissanik nalunaaruteqarnissanut, taamaattorli ukioq taanna ulloq 30. april paasissutissat aatsaat nalunaarutigalugit. Taamaattoqartillugu taamaallaat marsip qaammataanut tapiissutit tunniunneqassanngillat. Februaarip qaammataani pisussaaffik qaammammut tamarmut atuutinngilaq, taamaattumillu februaarimi pisussaaffik qaammammi ilivitsumi unioqqutinneqarsimanani. Apriilip qaammataani paasissutissat qaammat suli naanngitsoq tunniunneqarput, taamaattumillu aamma tassani qaammammi ilivitsumi pisussaaffik unioqqutinneqarsimanani.

Tapiissutit qanoq sivisutigisumik tunniunneqanngissinnaanerit killilerneqarsimanngilaq, tamatumunnga taamaallaat aalajangiisuummat ilaasortap qaqugukkut paasissutissiisussaartitaanerminik naammassinnissimanera. Imm. 3-mi qaammatit arfinillit tikillugit utertitsisinnaaneq, soorunami atuutsinneqarsinnaanngilaq imm. 1 malillugu tapiissutinik tunniussisoqarsimanngippat.

Imm. 2-mi erseqqissarneqarpoq, paasissutissat suut pisussaaffimmi imm. 1-imi eqqartunneqartumi ilaatinneqassanersut. Tassani pineqarput Inatsisartunut ilaasortap nammineq atuuffii aningaasatigullu soqutigisai pillugit paasissutissat, ilaasortap Inatsisartut Suleriaasiat naapertorlugit Inatsisartunut nalunaarutigissallugit pisussaaffigisai. Paasissutissat tamanut saqqummiunneqarsinnaasut Suleriaatsimi aalajangersarneqarsinnaavoq.

Inatsisartut atuuffinnik nalunaarsuiviat atuuttoq, nalinginnaasumik nassuiaatini imm. 2.2-mi allaaserineqartoq maannamut malittarisassat malillugit nammineq piumassutsimik aqqissuussineruvoq, taanna naapertorlugu Inatsisartunut ilaasortat atuuffitik aningaasatigullu soqutigisat paasissutissiisutigisinnaallugit tamanut saqqummiunneqarnissaat siunertaralugu. Aqqissuussinerup nammineq piumassutsimik tunngaveqarnera pissutigalugu paasissutissat amigaataasut pinngitsoorani paasissutissiisutigineqartussat isigineqarsinnaanngillat, taamaattumillu aalajangersakkamut tassunga ilaatinneqarsinnaanatik. Inatsisartut Siulittaasoqarfiatali siunertara Inatsisartut Suleriaasiata allanngortinneqarnissaanik siunnersuuteqarniarluni, nammineq piumassutsimik aqqissuussineq pinngitsoorani naammassineqarsimasussanngorlugu. Taamaattoqassappat naatsorsuutigineqarpoq atuuffimminik nalunaarsuiffimmut paasissutissiisussaartitaanerup § 4 a-mut ilaatinneqarnissaa.

Imm. 2-mi ilanngullugu erseqqissarneqarpoq paasissutissat aalajangersimasumik iluseqartillugit tunniunneqartarnissaat Inatsisartut Suleriaasianni aalajangersarneqarsinnaasoq.

Tamanna nammineq piumassutsimik atuuffinnik nalunaarsuivimmut atuuttumut atuutereerpoq, paasissutissat taakku immersuivissaq aalajangersimasoq atorlugu tunniunneqartartussaammata, taamatullu aamma atsiukkamik nalunaaruteqartoqartarluni paasissutissat tamanut saqqummiunneqarsinnaanerak akueralugu.

Paasissutissat ilusissatut piumasaqaatinik naammassinninngitsut aallaavittut Inatsisartunit tiguneqarsimannngitsutut isigineqartarput, taamaattumillu ilusissamittut tunniunneqarnissamik tungaanut tamanna tapiissutit annaaneqarnerannut tunngavissaalluni.

Imm. 3-mi aalajangersarneqarpoq imm. 1 naapertorlugu tapiissutaareersunik qaammatit arfinillit tikillugit utertitsinissaq Inatsisartut piumasarisinnaagaat, paasinarsissagaluarpak paasissutissiissutaasut amigaatigineqartut annertuumilluunniit amigaateqartut. Aalajangersaq atorneqartassaaq tapiissutit tunniunneqareersimatillugit, naak kingusinnerusukkut paasinarsissagaluartoq imm. 1 malillugu tapiissutisinissaq piumasaqaatigineqarsinnaanngikkaluartoq.

Aalajangersakkap atorneqarneranut apeqqutaanngilaq sooq taamaakkaluartoq tapiissutininik tunniussisoqarsimanersoq, tassunga ilanngullugu ilaasortap, partiip, Siulittaasoqarfiup Inatsisartut Allattoqarfialuunniit eqqumaffigisinnaasimagaluaaraat eqqumaffigisinnaasimasariaqarluguluunniit paasissutissat tunniunneqarsimannngitsut amigaateqartulluunniit.

Paasissutissat tunniunneqartut amigaateqarnerak pineqarpat tapiissutit aatsaat uterteqquneqarsinnaassapput paasissutissiinermi amigaatit ingasattumik sumiginnaanermik pissuteqarpat. Tamatuma malitsigisaanik amigaat imarisamigut pingaaruteqassaaq, taamatullu aamma amigaateqarneq annertuumik sumiginnaanermut ersiutaassalluni. Taamaalilluni siunertarineqanngilaq amigaatit kukkulaarnerillu nalinginnaasumik eqeersimaannginnermik pissuteqartutut oqaatigineqartariaqartut utertitsisussaataaneramik malitseqartinneqartarnissaat, naak taakku tunngavissaagaluartut tapiissutit siumut isigisumik unitsinneqarnissaannut.

Ingasattumik sumiginnaanertut assersuutitut taaneqarsinnaasoq Inatsisartunut ilaasortap siulersuisuni aningaasaqarsissutaasartumik ilaasortaaffeqarneq pillugu paasissutissiinissani puigorpagu, akerlianilli ingasattumik sumiginnaanerussanani ass. atorfik ersernerluttumik allaaserineqarsimappat, ass. ”ilaasortatut” ”siulittaasup tullianut” taarsiullugu. Pisut ilaanni allaat siulersuisuni inissisimaffeqarnermik paasissutissiinnginneq ingasattumik sumiginnaanersut isigineqartariaqanngilaq, ass. ilaasortap siulersuisuni atuuffia piffissami paasissutissanik tunniussiviusussami naasussanngorsimappat toqqagaaqqinnissaq ilimanarani.

Imm. 3-mi tapiissutit sivisunerpaamik qaammatinut arfinilinnut uterteqquneqarsinnaanerak killilerneqarpoq. Taamatut killiliinikkut Inatsisartunut ilaasortat taakkulu partiivi il.il.

illersorniarneqarput paasissutissanik tunniunneqartussaataitaasunik amigaateqartoqartillugu partiip aningaasaqarniarnerata iluarsineqarsinnaanngitsunik innarlerneqarsinnaanera pinngitsoorniarlugu. Taamatut killiliineq atuutissaaq paasissutissiilluni immersuivissami kukkunerit ingasattumilluunniit sumiginnaanerit qassit nassaarineqarnerat, imaluunniit kukkunerit ataatsikkut ataasiakkaarlugilluunniit nassaarineqarnerat, apeqqutaatinnagu.

Nr. 3-mut

§ 9-mut ilanngussassatut siunnersuutikkut Inatsisartut periarfissinneqassapput partiinut tapiissutit ilanngarnerisigut partiit, kattusseqatigiit ilaasortalluunniit ataasiakkaat sinnerlugit Inatsisartunit aningaasartuutaasimaasut matussusernissaannut.

Taamatut ilanngaaneq pisinnaassaaq tapiissutini tamani naalackersuinikkut sulinermut aningaasatigut tapiissuteqartarnek pillugu inatsit malillugu tunniunneqartartuni, tunngaviumik tapiissutaanerat, ilaasortamut ataatsimut tapiissutaanerat imaluunniit § 4 malillugu tapiissutaanerat il.il. apeqqutaatinnagu. Partiit il.il. ilaasortaatitaminik sinnerlugit aningaasartuutaasimasut utertinneqartarnissaat sapertariaqassanngilaat, tassami inatsit taanna malillugu partiinut tapiissutit aningaasartuutininut taamaattunut matussutissaasutut oqaatigineqarsinnaammata.

Oqaaseqatigit ”ilanngaasinnaapput ilanngaatitsisinnaallutilluunniit” atorneqarpoq ilanngaateqarnissaq siunertaralugu Inatsisartut namminnek partiinut tapiissutinik tunniussisuusariaqannginnerat eqqarsaatigalugu. Tapiissutinik tunniussisarnek susasaqartumit avataanersumit taannaluunniit aqqutigalugu ingerlanneqarpat, taamaalilluni Inatsisartut ilanngaateqarnissamik piumasaaqatertik tassunga nalunaarutigisinnaavaat, taamalu taamaaliornikkut isumagalugu amigaasat pineqartut unitsinneqarnissaat Inatsisartunut utertinneqarnissaat siunertaralugu.

”Aningaasartuutit” pineqartillugit taamaallaat pineqanngillat susasaqartunut avataaneersunut toqqaannartumik aningaasartuutit, ass. akiligassiissut tunngavigalugu nutserisumut aningaasartuut akilerneqarsimapput, kisiannili aamma pineqarlutik aningaasartuutit Inatsisartut Allattoqarfianni nukissanik atuisimaneq tunngavigalugu pilersimasut. Tamatumani assersuutitut taaneqarsinnaapput allakkianik amerlasuunngortitsinermit aningaasartuutit, kiisalu suliassap matuma naammassineqarnissaanut akissarsiat atorneqarsimasut. Taamatuttaaq tamatumunnga ilanngunneqarsinnaapput ilusissatut piumasaaqatit il.il. naapertorlugit atortussat tunniunneqartut iluarsaallugit suliarinerinut aningaasartuutit.

Inatsisartut aningaasartuutininut akigititassanut, soorlu akunnermut amerlisaanermullu akigititassanut, siumut aalajangersaasimanngippat, aningaasartuutit aalajangersarneqarsinnaapput nukissanik atuisimanermik naapertuuttumik missingiinikkut. Missingiinerit akigititassatullu aalajangersagaajunnartut tamatumunnga atatillugu Inatsisartunut isertitsissutaassanngillat, kisiannili pisortat iluanni akiliuteqartitsisarnermut aalajangersaasarnermut killiliussat iluanniittariaqarlutik.

Aningaasartuutit aalajangersagaq taanna malillugu uterteqquneqarsinnaasussat nalinginnaasumik inatsisartutigoortumik sulinerup iluamik ingerlanneqarnissaata qulaarneqarnissaanik Inatsisartut soqutigisaqarnerannut attuumassuteqartartussaapput. Nalinginnaasumik assersuutigalugu tamatumani pineqarsinnaapput Inatsisartut Allattoqarfiata taassumaluunniit avataani suleqatigisaata ilusissani amigaatinik iluarsisuteqarneri, tassunga ilanngullugit partiit oqaaseqartuisa oqaaseqaataasa nutserneqarsimanginneri amigarneriluunniit pissutigalugit nutserisitsinerit, taamaaliornikkut qularnaarniarlugu Inatsisartunut ilaasortap kissaatigineqartutut naatsorsuutigineqartutullu Inatsisartut sulinerannut peqataasinnaanissaa.

Taamatut pisut, Inatsisartut sulinerannut partiinullu tapiissuteqartarnermut siunertamut imaaliallaanaq attuumassuteqartut, avataatigut partiit il.il. sinnerlugit aningaasartuuteqarnissamut taamaallaat killilerujussuarmik periarfissaqassaaq, taamaattorli kissaatigineqarsimangitsumik ingerlatsisimanermit nalinginnaasumik taarsiissuteqartarnermut najoqqutassat takoqquneqarlutik.

Taamatut ilanngaassiniarnernut partiinit il.il. uparuaassutaajunnartut Inatsisartut Siulittaasoqarfiannut saqqummiunneqarsinnaasapput. Ilanngaassiniarneq pillugu isumaqatigiittoqarsinnaanngippat tamatumani nalinginnaasumik saqitsaassuseqarneq pineqassaaq partiip il.il. eqqartuussivinnut nalinginnaasunut suliassanngortissinnaasaa.

#### *§ 2-mut*

Aalajangersakkani inatsimmik allanngortitsineq qaqugu atuutilissanersoq aalajangersarneqarpoq.